

## Fantom: kvalitet mora da pobjedi!

■ *Producent i menadžer Fantom jedan je od onih koji žele da naprave nešto drugačije. U ovim vremenima, drugačije, nažalost, podrazumjeva kvalitet. Koncerte zvijezda koje su upravo kvalitetom zaslužile da ih ljudi tako zovu...*

**BUM:** Bili smo svjedoci koncerta Bijelog Dugmeta u Beču, predstoje nam koncerti Georgieva i Čole u Stadthalle. Evidentno je da radite samo sa najboljima.

Fantom: Pa, u posljednjih godinu i po dana radim punom parom. Odrađeni su koncerti Bijelog Dugmeta u Kanadi, Americi, Australiji, u Beču i ja sada nastavljam dalje. Predstoje nam koncerti u Švedskoj, Njemačkoj, Danskoj, Švicarskoj i drugim evropskim zemljama. Nije neskomno reći da su pomenuti koncerti organizovani na

evropskom, čak na svjetskom nivou. Publika u Beču se uvjerila u to. Na spektaklu sa 5.000 ljudi u dvorani i nešto manje ispred nje, nije bila potrebna

ni jedna jedina intervencija bečke policije, vatrogasaca ili ekipe hitne pomoći! Policiji je bilo neshvatljivo da neko iz "jugo publike", kako nas oni nazivaju, nije izazvao tuču ili neki sličan problem. Pazite, u ovom gradu ima itekako puno naših ljudi koji idu

u pozorišta, čitaju knjige i upravo ti ljudi čine većinu publike za koju ja već evo više od 17 godina radim koncerte. Sve ove godine se trudim da radim na tom nivou i da držim nivo kvaliteta. Kvalitet mora da pobjedi!

**BUM:** Šta bečka publika može da očekuje 10. marta na koncertu Vlade Georgieva?

Fantom: Vlado Georgiev je lik novijeg datuma, ali ima savršen prilaz poslu koji radi. On je prevazišao varijante kafana i diskoteka. Moram se malo zaustaviti na terminu diskoteka. Pazite, naše diskoteke ne postoje, to su folkoteke! Šta ima Mitar Mirić da traži

u jednoj diskoteci? Može izgledati kao diskoteka, ali kad krene program, to nema veze sa diskotekom. Ono što ja radim je nešto drugo. Koncert Georgieva sigurno će biti praznik za uši. Tu će biti i pjesama

sa njegovog novog materijala koje će prvi put predstaviti u Beču. On je na novom materijalu radio dugo, uložio ogromne novce i u projekat uključio najbolje muzičare, tako da će taj album biti svojevrsna muzička revolucija na domaćoj sceni.

**BUM:** Onda dolazi Čola...

Fantom: Da, 5. maja u Stadthalle. U dvorani D, koja je najveća. Dakle na mjestu gdje gostuju samo svjetske zvijezde. Čola je u svojoj čitavoj karijeri branio i odbranio titulu megazvijezde. To će biti njegov najveći koncert koji je ikada imao van naših granica. Svako ko doživi taj spektakl pamtiće ga dok je živ! Ako neko pomisli da ja sada "pumpam priču", neka samo pomisli na nedavni koncert Bijelog Dugmeta. Ni za Čolu, ni za Georgieva nisam rekao ni 5 posto od stvarne istine.

